

LINIIS VUIDE PE VALORIZAZION DES GNOVIS REALIZADIS DES RADIOS IN LENGHE FURLANE

(Radio Onde Furlane e Radio Spazio 103)

INTRODUZION

L'articul 25, come 1, de Leç regjonâl 29/2007 al domande di adotâ un Plan gjenerâl di politiche linguistiche (PGjPL), definît par solit ogni cinc agns par otignî, tra chei altris, chescj obietîfs:

- garantî ai citadins di lenghe furlane l'esercizi dai dirits linguistics;
- promovî l'ûs sociâl de lenghe furlane e il so svilup tant che codiç linguistic just par dutis lis situazions de vite moderne;
- smirâ a une politiche linguistiche unitarie, midiant dal coordinament des azions programadis di altris ents e istituzions publichis e privadis;
- fissâ criteris e prioritâts par intervents intal setôr dai mieçs di comunicazion.

Il Plan Gjenerâl di Politiche Linguistiche fat bon de Regjon in vie definitive cun Decret dal President de Regjon n. 0179 / Pres. dai 26 di Otubar dal 2021 daûr de deliberazion de Zonte regjonâl n. 1624 dai 22 di Otubar dal 2021, al cîr di otignî chescj obietîfs principâi:

- ripristinâ la trasmission intergenerazionâl de lenghe;
- miorâ il nivel cualitatîf de competence in lenghe (ancje tal scrit);
- inçressi l'ûs sociâl de lenghe.

Mieçs di comunicazion

Inte sezion dal PGjPL dedicate ai mieçs di comunicazion, si marche che chescj a son un strument fundamentâl pe promozion e pal svilup des lenghis di minorance. Cjalant aes emitentis radiofonichis privadis, il furlan al è doprât soledut intes dôs radios che a lavorin tant che ents ricognossûts de Regjon pe tutele, valorizazion e promozion de lenghe furlane: Radio Onde Furlane e Radio Spazio 103. Lis dôs emitentis a produsin e a trasmetin ogni dì notiziaris, rubrichis e programs di informazion, aprofondiment e intratigniment e a àn garantît une continuitât di azion, fasint ancje une ativitât sostitutive dal servizi public (par esempi cui radiogjornâi), e rivant a proponi e a sperimentâ formâts inovatîfs.

Tal pont 8.2 dal PGjPL, dulà che a son segnadis lis modalitâts operativis par garantî ai citadins l'esercizi plen dai dirits linguistics, si ricognòs che pai fins dal articul 23, come 2, de L.R. 29/2007, Radio Onde Furlane e Radio Spazio 103 s.r.l. a lavorin par garantî la fruibilitât dai programs ancje in rê, cun sîts internet e/o aplicazions specifichis par podê sedi scoltâ la radio in streaming sedi discjamâ i podcast di dutis lis trasmissions in lenghe furlane.

Par sigûr la presince dal furlan intal setôr dai mieçs di comunicazion e je cressude intai agns ancje in graciis di internet e si è sfrancjate avonde di une vision dome folcloristiche e tradizional, ma al moment il panorame dai mieçs di comunicazion su internet in lenghe furlane al è ancjemò limitât. Soredut intai mieçs di informazion la lenghe furlane in forme scrite e varès di vê plui continuitât.

Par chest fin, a jentrin in zûc lis potenzialitâts des radios nomenadis, e a lôr si vuelin furnî chestis liniis vuide - elaboradis in colaborazion cu la Regjon - cun riferiment ai obietîfs strategjics dal PGjPL, pe realizazion di pagjinis web che a dedin fûr par scrit lis gnovis letis intai GR che za a son mandâts in onde.

OBIETÎFS

- Miorâ la difusion de alfabetizazion in lenghe furlane

I mieçs di comunicazion a àn un rûl impuartant par favorî la alfabetizazion in lenghe furlane, soredu intè forme scrite.

Duncje al è impuartant inçressi ancje la difusion de lenghe furlane intai orghins di informazion, miorant ancje il nivel cualitatîf de ufierte.

I sogjets che a lavorin intal setôr radiofonic tant che ents ricognossûts par leç, za a pandin ogni dì gnovis e informazions in lenghe furlane, e i lôr tescj a puedin jessi ripuartâts in forme scrite online (doprant la grafie uficiâl daûr dal articul 13 de Leç regionâl 15/1996), e a puedin duncje vê un rûl continuatîf di orghins di informazion in plui che mieçs di intratigniment.

- Alçâ il status de lenghe furlane

Par alçâ il status, al è impuartant promovi l'ûs de lenghe furlane tant che strument di podê doprâ in ogni situazion de vite cotidiane e inçressi l'ûs sociâl de lenghe.

Duncje si calcole che la presince cun continuitât de lenghe furlane intai orghins di informazion, soredu intè forme scrite, e sedi strategjiche pal status e pe cressite de lenghe stesse.

Lis radios in lenghe furlane, esercitant ancje un rûl di orghins di informazion online, a puedin ampliâ il lôr target di riferiment, che, tacant dal lôr public tradizionâl, si pues slargjâ ancje a altris utents interessâts a usufruî di un servizi di gnovis e di informazions in lenghe furlane.

Par chest fin i sogjets interessâts a puedin doprâ i lôr sîts internet ma ancje colaborâ suntun sît condividût, dulà che si puedin zontâ ancje altris mieçs di comunicazion, intune prospetive di ampliament de base di public e di contignûts.

- Favorî la trasmission intergjenerazionâl de lenghe furlane

La trasmission intergjenerazionâl e je fondamentâl par preservâ la lenghe furlane e e je un obietîf prioritari dal Plan Gjenerâl di Politiche Linguistiche.

In gjenerâl, une presince plui fuarte de lenghe furlane intai mieçs di comunicazion e contribuîs ancje ae educazion linguistiche des gnovis gjenerazions.

I mieçs di comunicazion par furlan a incoragjin i zovins a miorâ la cognossince de lenghe e a disvilupâ une cussience linguistiche plui fuarte.